

Gyɔn ɔwɔɛ Gyangbarasɛ

Kirisito ɔbono A Wu De Ansi Mɔ

¹ Kirisito ɔbono ɔ wolaa ɔ bo no lii ko-o gɛsɛ de gɛsɛ mɔ, mɔ ɔbono a nu mɔ-ilaa tɔgɛsɛ ne a wu mɔ de aye-ansi, ne a kerɛ mɔ dandan ne a nyɛ mɔ yii mɔ, mɔ-ilaa ne a kya baa a' baa tɔgɛ faa. Mɔ ne n gyɛ gigyɛbi gibono gi kya sa Wurubuaarɛ asɛ gɛkyena ɔnan mɔ. ² Gɛnen Wurubuaarɛ asɛ gɛkyena gɛdɛ gɛ lii gɛwi gɛsinkpan so. A wu mɔ de ansi. Mɔ-ilaa ibono a wu mɔ ne a kya buu a kya sa fɛye faa. Mɔ gbaa-gbaa ne n gyɛ Wurubuaarɛ asɛ gɛkyena gɛkpaa mɔ. Nkana ɔ bo mɔ-sɛ Wurubuaarɛ asɛ ne Wurubuaarɛ gi san lɛɛ mɔ-gɛwi nyiile aye gɛsinkpan so. Mɔ-ilaa ne a kya lɛɛ a kya tɔgɛ faa. ³ Imɔso ilaa ibono a wu ne a nu gɛnen mɔ, imɔ ne a kya tɔgɛ a kya sa fɛye de aye-rɛ fɛye kee a' nyɛ wɔra nyamesɛ kolon. Aye berɛ aye-rɛ Wurubuaarɛ de mɔ-bi Yesu Kirisito a ti wɔra nyamesɛ kolon. ⁴ A kya ɲmarasɛ imɔ idɛ a kya sa fɛye de aye-rɛ fɛye pɛwu a' nyɛ gyi ɔkon dabɔɛ kpaa logɛ.

ɔkalan ɔbono Kirisito Gi Sa Aye Mɔ

⁵ ɔkalan ɔbono a nu lii Kirisito asɛ ne a kya lɛɛ tɔgɛ sa fɛye mɔ ne n gyɛ yɛɛ Wurubuaarɛ gyɛ fatela; gibiri giɲ bo mɔ dɔ ba-a pii faa. ⁶ Nengyene a tɔgɛ yɛɛ aye-rɛ Wurubuaarɛ a gyɛ nyamesɛ kolon yɛgɛ a naa daa ilaa nyɛnyɛn ibono i gyɛ gibiri dɔ mɔ, a kya kɛɛ abon daa. Aye-gɛkyena dɔ mɔ, a mɛɲ naa gɛsintin ɔkpa mɔ so ne. ⁷ Nengyene a buu fatela mɔ aye-gɛkyena dɔ fɛɛ gɛnɔɔbono Wurubuaarɛ bo fatela dɔ mɔ, aye-rɛ aye-nanboana Yesu asonbo mɔ a laa wɔra nyamesɛ kolon, ne

Yesu, Wurubuaare mɔ-bi mɔ nkalan mɔ gi laa kpɛ gi kya kpaare aye-ilaa nyɛnyɛn pɛwu lii aye so.

⁸ Nengyene a tɔge yɛɛ a mɛɲ bo ilaa nyɛnyɛn iko mɔ, a kya penɛ aye-nyoro daa. Gɛsintin gɛɲ bo aye dɔ ne. ⁹ Nengyene a lɛɛ aye-ilaa nyɛnyɛn ibono a wɔra mɔ tɔge sa mɔ mɔ, Wurubuaare gyɛ ɔpaawɔrabo ne ɔ bo gɛsintin so mɔ, ɔ laa kyu aye-ilaa nyɛnyɛn kyɛɛ aye de ɔ' kpaare aye-asen dɔ de ilaa kamaasɛ ibono iɲ boran sa mɔ mɔ i' lii aye dɔ. ¹⁰ Nengyene a tɔge yɛɛ a mɛɲ wɔra ilaa nyɛnyɛn iko mɔ, a kya laare a' ten Wurubuaare gɛnɔ ne. Mɔ-agyɛbi mɔ aɲ bo aye-asen dɔ.

2

A Nyi Wurubuaare?

¹ Me-biana, n kya ɲmarasɛ gɛnen ilaa idɛ mi-i sa fɛye de i' kpaɛ fɛye de fɛɲ sa fɛ' wɔra ilaa nyɛnyɛn. Nengyene fɛɛ fɛye dɔ ɔko gi taa wɔra ilaa nyɛnyɛn iko mɔ, fɛ' bii yɛɛ a bo ɔbono ɔ yeɛ aye-giyaa dɔ mɔ-sɛ Wurubuaare asɛ ɔ kya dɛ giserɛ. Mɔ ne n gyɛ Yesu Kirisito, Gɛsintin Wura mɔ. ² A wɔra ilaa nyɛnyɛn mɔ, mɔ ne n kyu mɔ-nyoro pataa Wurubuaare sa aye. Ne iɲ gyɛ aye-wolɛ gbaa, aye-rɛ gɛsinkpan so anyamesɛ pɛwu. ³ Ilaa ibono i laa yege a' nyɛ bii aye-asen dɔ yɛɛ a nyi Wurubuaare mɔ ne n gyɛ yɛɛ, “A kya gyi Wurubuaare nbara so?” ⁴ Nyamesɛ ɔbono ɔ kya tɔge yɛɛ, “N nyi Wurubuaare, n nyi Wurubuaare” yege ɔ mɛɲ kya gyi Wurubuaare nbara so mɔ, gɛnen kaasɛ ɔbono gyɛ daa ɔbonbo. Gɛsintin gɛɲ bo mɔ asɛ. ⁵ ɔbono ɔ kya gyi Wurubuaare nbara so mɔ berɛ, gɛnen kaasɛ ɔbono kya laare Wurubuaare ilaa gɛsintin lii mɔ-gisen dɔ kpaɛ lii. Nan tɔge fɛye ilaa ibono i laa yege a' nyɛ bii aye-asen dɔ yɛɛ aye-rɛ Wurubuaare a kya loo mɔ. ⁶ Imɔ ne n gyɛ yɛɛ nyamesɛ ɔbono ɔ kya

tɔgɛ yɛɛ ɔ naa de Wurubuaarɛ mɔ, i kaaborɛ mɔ-anaabi a' wɔra daa fɛɛ Yesu-lɛɛ ɔnan.

Laarɛ Fo-Nanbo Kirisito Sonbo Ilaa

⁷ Me-nanboana laarɛɛ, iɲ gyɛ nbara pɔbɔɔ ne n' kya ηmarasɛ mi-i sa fɛye. Nbara mɔ gi gyɛ daa ndedaa nbono fɛ ti wolaa fɛ dɛ nmɔ lii giyiigɛɛ. Nmɔ ne n gyɛ Yesu agyɛbi abono fɛ ti nu amɔ so mɔ. ⁸ ɔkpa ɔko so berɛ mɔ, nbara nbono n kya ηmarasɛ faa gi gyɛ daa npɔbɔɔ. Kyu lii Kirisito so de fɛye kee so mɔ, gi gyɛ daa nbara npɔbɔɔ gɛsintin. I kya nyiile yɛɛ gibiri mɔ gi ti gi kya kyon ne gɛsintin fatela mɔ ti ɔ kya wu.

⁹ Nyamesɛ ɔbono ɔ kya tɔgɛ yɛɛ ɔ bo Wurubuaarɛ fatela mɔ dɔ, yɛgɛ ɔ kya kyo mɔ-nanbo Kirisito sonbo mɔ, gɛnen kaasɛ ɔbono san ɔ bo ilaa nyɛnyɛn gibiri mɔ dɔ ne. ¹⁰ Nyamesɛ ɔbono ɔ kya laarɛ mɔ-nanbo Kirisito sonbo ilaa mɔ kya kyena daa Wurubuaarɛ fatela mɔ dɔ, ne iɲ bo sɛi fatela mɔ dɔ ibono i laa yɛgɛ de o' sidi. ¹¹ ɔbono mɔ, ɔ kya kyo mɔ-nanbo Kirisito sonbo mɔ berɛ, bo daa ilaa nyɛnyɛn gibiri dɔ. ɔ wɔra fɛɛ ɔbono ɔ naa gibiri dɔ mɔ, ɔ mɛɲ nyi nfono ɔ kya kpe. Mɔ-gɛkyo gɛ yɛgɛ ɔ wɔra fɛɛ gyaatanbo.

N Kya ηmarasɛ Mi-i Sa Fɛye Abono Fɛ Gyɛ Kirisito-lɛɛ Mɔ

¹² Me-biana, n kya ηmarasɛ mi-i sa fɛye

yɛɛ kyu lii Kirisito so mɔ

Wurubuaarɛ gi kyu fɛye-ilaa nyɛnyɛn kyɛɛ fɛye.

¹³ Me-sɛana, n kya ηmarasɛ mi-i sa fɛye

yɛɛ fɛ nyi Kirisito

ɔbono ɔ wolaa ɔ bo no lii ko-o gɛsɛ de gɛsɛ mɔ.

Adega, n kya ηmarasɛ mi-i sa fɛye

yɛɛ fɛ nyɛ ɔlon ɔbonsan, nyamesɛ nyɛnyɛn mɔ so.

Me-biana, n kya ηmarasε fεye ɔwolε baarε, n kya tɔgε
fεye

yεε fε nyi aye-sε Wurubuaarε.

¹⁴ Me-sεana, n kya ηmarasε fεye ɔwolε baarε n kya tɔgε
fεye

yεε fε nyi Kirisito ɔbono ɔ bo no lii ko-o gεsε de
gεsε mɔ.

Adega, n kya ηmarasε fεye ɔwolε baarε n kya tɔgε fεye

yεε fε bo ɔlon, Wurubuaarε agyεbi mɔ a tε fεye-
asen dɔ,

ne fε nyε ɔlon ɔbonsan, nyamesε nyεnyεn mɔ so.

Mεη Kya Son Awura Anyɔ

¹⁵ Imɔso fε naa gεsinkpan gεdε so faa, fε mεη sa fε'
yεgε gεrεnaa asa abono mεη kya ka Wurubuaarε gεnɔ
mɔ mɔmɔ-gεkyena ɔnan abεε mɔmɔ-ilaa wɔrasε i' da
fεye ɔbolε. Nengyene mɔmɔ-ilaa wɔrasε i kya da fo ɔko
ɔbolε mɔ, foη bo gεlaarε' sa Wurubuaarε lii fo-gisen dɔ
ne. ¹⁶ I kya nyiile yεε mɔmɔ-nwɔnsa dɔ ilaa i mεη lii
Wurubuaarε asε. Mε kya nu de mɔmɔ-ɔbolε gεlaarε
ilaa, mε kya diile gεsinkpan so ilaa ne i kya gyi mɔmɔ-
amu, ne mε kya nyiile mɔmɔ-nyoro kyu lii ilaa ibono mε
bo abεε ilaa ibono mε kya wɔra mɔ so. Gεnen nwɔnsa
ndε ɔnan pεwu gi mεη lii Wurubuaarε asε. Gi lii daa
gεsinkpan gεrεnaa gεkyena gεbono asa mε tε ne mεη
kya ka Wurubuaarε gεnɔ mɔ asε. ¹⁷ Gεsinkpan gεdε so
gεkyena de gεmɔ so ilaa ibono i kya gyi asa amu mɔ i
kya laarε i' yela ɔkara. ɔbono ɔ kya wɔra Wurubuaarε
gεlaarε mɔ berε, laa kyena Wurubuaarε asε gεkpaa-
gεkpaa.

Gεnɔɔbono Kirisito Adε Mε Kya Bii Kirisito Akyobo

¹⁸ Me-biana, aye-gεsinkpan so gεkyena nkε laalaalogε
mɔ gi fo. Fεε gεnɔɔbono fε wolaa nu yεε nkε laalaalogε

mɔ dɔ mɔ, Kirisito ɔkyobo mɔ laa ba mɔ, idɛ kon, Kirisito akyobo mɛ nyaakyɔ. Imɔso ne a nyɛ bii yɛɛ nkɛ laalaalogɛ mɔ gi fo mɔ. ¹⁹ Kirisito akyobo adɛ mɛ lii aye dɔ. Mɛɲ gyɛ aye dɔ. Nengyene fɛɛ mɛ gyɛ aye dɔ mɔ, nkana ɔfaanan mɛ san mɛ bo aye dɔ baa lii de ndɛ. Mɛ lii aye dɔ gɛnen daa de i' nyɛ lɛɛ gɛwi nyiile tentegelen yɛɛ mɔmɔ pɛwu mɛ mɛɲ gyɛ aye dɔ.

²⁰ Fɛye berɛ, Kirisito ɔbono mɔ-nkon ne n lii Wurubuaarɛ asɛ mɔ gi yɛgɛ Wurubuaarɛ Oduduu mɔ gi suu de fɛye de fɛ' wɔra mɔ-asunbo. Fɛye pɛwu fɛ nyi gɛnen ilaa idɛ. ²¹ N kya ɲmarasɛ fɛye gɛnen ɔwolɛ baarɛ faa, i mɛɲ gyɛ yɛɛ fɛ mɛɲ nyi gɛsintin mɔ so. Fɛ nyi. Fɛ nyi kee yɛɛ iɲ bo abon ako yɛɛ amɔ berɛ, a lii daa gɛsintin mɔ asɛ. ²² Anɛ mɔ ne n gyɛ ɔbonbo mɔ? Gɛnen mɔ, ɔbono ɔ kya kine yɛɛ iɲ gyɛ Yesu ne n gyɛ ɔbono Wurubuaarɛ gi sun lii Wurubuaarɛ dɔ yɛɛ ɔ' baa mɔlɛgɛ anyamesɛ mɔ, gɛnen kaasɛ ɔbono ne n gyɛ ɔbonbo mɔ. Mɔ ne n gyɛ Kirisito ɔkyobo mɔ. Mɔ kee ne n gyɛ ɔbono ɔ kya kine Wurubuaarɛ mɔ-rɛ mɔ-bi Yesu pɛwu mɔ. ²³ ɔkamaasɛ ɔbono ɔ kya kine yɛɛ Yesu mɛɲ gyɛ Wurubuaarɛ mɔ-bi mɔ maɲ taalɛ terɛ Wurubuaarɛ yɛɛ mɔ-sɛ. ɔbono mɔ ɔ kya lɛɛ tɔgɛ sansana yɛɛ ɔ kya sɔɔ Yesu, Wurubuaarɛ mɔ-bi mɔ gyi mɔ berɛ, ɔ laa taalɛ terɛ Wurubuaarɛ yɛɛ mɔ-sɛ.

Fɛ' Kyena Kirisito Dɔ Gɛnen

²⁴ Fɛ' yɛgɛ ilaa ibono fɛ wolaa nu lii gɛsɛ de gɛsɛ mɔ i' kyena fɛye dɔ. Nengyene ilaa ibono fɛ wolaa nu mɔ i tɛ fɛye dɔ mɔ, fɛye kee fɛ laa kyena Wurubuaarɛ mɔ-bi mɔ dɔ de Wurubuaarɛ gbaa-gbaa dɔ. ²⁵ Ilaa ibono Yesu Kirisito gi ka yela sa aye abono a kya sɔɔ mɔ gyi gɛnen mɔ ne n gyɛ yɛɛ ɔ laa yɛgɛ de a' nyɛ Wurubuaarɛ asɛ gɛkyena ɔnan gɛkpaa.

²⁶ Asa abono mɛ kya laarɛ mɛ' penɛ fɛye mɔ so ne n' kya ŋmarasɛ imɔ idɛ n kya sa fɛye faa. ²⁷ Fɛye berɛ, Kirisito gi yɛgɛ Wurubuaarɛ Oduduu mɔ gi suu de fɛye, ne ɔ san ɔ bo fɛye dɔ. Imɔso i mɛŋ baa i tiri yɛɛ ɔko ne ɔ' baa nyiile fɛye ilaa idɛ. Wurubuaarɛ Oduduu ɔbono ɔ suu de fɛye mɔ wolaa ɔ kya nyiile fɛye ilaa kamaasɛ. Ilaa ibono ɔ kya nyiile fɛye gɛnen mɔ i gyɛ daa gɛsintin. I mɛŋ gyɛ abon. Imɔso fɛ' kyena Kirisito dɔ fɛɛ gɛnɔɔbono Wurubuaarɛ Oduduu mɔ gi nyiile fɛye mɔ. ²⁸ Me-biana, fɛ' kyena Kirisito dɔ. Nengyene o kii ba mɔ de a' nyɛ da gikan yeɛ mɔ-ansi dɔ de a mɛŋ sa a' seɛ ipeeli.

Abono Mɛ Gyɛ Wurubuaarɛ Mɔ-Biana Gɛsintin Mɔ Ilaa

²⁹ Fɛ nyɛ bii yɛɛ Wurubuaarɛ gyɛ gɛsintin wura mɔ, i kaaborɛ fɛ' bii kee yɛɛ ɔkamaasɛ ɔbono ɔ kya gyi gɛsintin mɔ, i lɔɔ korogɛ mɔ lii Wurubuaarɛ asɛ ne.

3

¹ Fɛ' kerɛ gɛnɔɔbono Wurubuaarɛ kya laarɛ aye abono a kya ka gyan Yesu so mɔ ilaa mɔ! Imɔ ne n gyɛ yɛɛ ɔ kya terɛ aye yɛɛ mɔ-biana. Ne gɛnen asa ne a san a gyɛ. Asa abono mɛ mɛŋ kya ka Wurubuaarɛ gɛnɔ mɔ berɛ, mɛ mɛŋ kya wu aye bii gɛnen. Mɛŋ nyi Wurubuaarɛ so daa ne i dɛ mɔmɔ gɛnen. ² Me-nanboana laarɛɛ, idɛ kon a bingiri Wurubuaarɛ mɔ-biana ne. Anyamesɛ abono ɔnan a laa baa wɔra gɛkaako mɔ berɛ Wurubuaarɛ mɛŋ ti taa lɛɛ imɔ-gɛwi. A nyi daa yɛɛ Yesu Kirisito gi kii ba mɔ, a laa wɔra fɛɛ mɔ-ɔnan. I kya nyiile yɛɛ a laa wu gɛnɔɔbono ɔ dɛ mɔ de aye-ansi. ³ Nyamesɛ kamaasɛ ɔbono mɔ-gɛwɔnsa gɛ gyan Kirisito so yɛɛ ɔ laa wu mɔ de ansi mɔ kya lɔɔ mɔ-gisen dɔ de i' fuuli fɛɛ gɛnɔɔbono Kirisito gisen dɔ i fuuli mɔ.

Ilaa Ibono So Asa ME Kya Wɔra Ilaa Nyɛnyɛn Mɔ

⁴ Ɔkamaasɛ ɔbono ɔ kya wɔra ilaa nyɛnyɛn mɔ mɛɲ kya ka nbara gɛnɔ. Ilaa nyɛnyɛn ne n gyɛ ibono nyamesɛ mɛɲ kya ka nbara gɛnɔ mɔ. ⁵ Fɛye abono fɛ kya ka gyan Kirisito so mɔ fɛ nyi ibono so Kirisito gi ba gɛsinkpan so mɔ. Ɔ ba daa de ɔ' baa kpaarɛ anyamesɛ ilaa nyɛnyɛn fuɛ. Ilaa nyɛnyɛn iko-rɛ iko iɲ bo mɔ dɔ. ⁶ Anyamesɛ abono mɛ tɛ Kirisito dɔ kee mɔ, mɔmɔ ɔko-rɛ ɔko maɲ kpɛ ɔ kya wɔra ilaa nyɛnyɛn. Abono mɛ kpɛ mɛ kya wɔra ilaa nyɛnyɛn mɔ berɛ, mɔmɔ ɔko-rɛ ɔko mɛɲ ti taa bii Wurubuaarɛ kerɛ, ne mɛ mɛɲ nyi Wurubuaarɛ.

Ilaa Nyɛnyɛn Pɛwu Gɛmu Mɔ Mɔ-Biana De Wurubuaarɛ Mɔ-Biana

⁷ Me-biana, fɛ mɛɲ sa fɛ' yɛgɛ de ɔko ɔ' penɛ fɛye. Nyamesɛ ɔbono ɔ kya gyi gɛsintin sa Wurubuaarɛ mɔ ne n gyɛ gɛsintin wura fɛɛ gɛnɔɔbono Kirisito gyɛ gɛsintin wura mɔ. ⁸ Ɔbono mɔ ɔ kya wɔra ilaa nyɛnyɛn mɔ gyɛ daa ilaa nyɛnyɛn pɛwu gɛmu mɔ-lɛɛ isa. Mɔ berɛ, ilaa nyɛnyɛn ne n kpɛ i gyɛ mɔ-ilaa wɔrasɛ lii gɛsɛ de gɛsɛ. Ilaa ibono so Wurubuaarɛ mɔ-bi mɔ gi ba gɛsinkpan so mɔ ne n gyɛ yɛɛ ɔ ba de ɔ' baa nyida ilaa nyɛnyɛn gɛmu mɔ ilaa wɔrasɛ. ⁹ Me-nanboana Kirisito asonbo, fɛ' bii yɛɛ ɔbono i lɔɔ korogɛ mɔ lii Wurubuaarɛ asɛ gɛsintin mɔ maɲ kpɛ ɔ kya wɔra ilaa nyɛnyɛn. Wurubuaarɛ gidebi ne n kya san kyena mɔ dɔ. Imɔso ɔ maɲ baa taalɛ wɔra ilaa nyɛnyɛn. I kya nyiile yɛɛ i lɔɔ korogɛ mɔ lii Wurubuaarɛ asɛ. ¹⁰ Ilaa ibono i laa lɛɛ nyiile fɛye yɛɛ asa adɛ ne n gyɛ Wurubuaarɛ mɔ-biana abɛɛ mɔmɔ adɛ ne n gyɛ ilaa nyɛnyɛn pɛwu gɛmu mɔ mɔ-biana mɔ ne n gyɛ ilaa idɛ: fɛ wu yɛɛ kaasɛ baarɛ mɛɲ kya gyi gɛsintin sa Wurubuaarɛ abɛɛ ɔɲ kya laarɛ mɔ-nanbo Kirisito sonbo mɔ, gɛnen kaasɛ ɔbono mɛɲ gyɛ Wurubuaarɛ isa ne.

Ɔlaare Ɔbono Ɔnan Ɔe Kaabore Kirisito Aɔe Mɔ

¹¹ I kya nyiile yee Yesu ɔkalan mɔ fe nu lii gese de gese mɔ kya nyiile aye abono a kya son Yesu mɔ yee a' laare abara. ¹² An sa a' wɔra fee Keen. Keen bere, gi wɔra ɔbonsan, nyamese nyenyen mɔ-lee isa. Ɔ mɔɔ mɔ-tede. Menɛ n wɔra so ne Keen gi mɔɔ mɔ-tede mɔ gɛnen daa? O wu yee mɔ gbaa-gbaa ilaa wɔrase in boran, ne mɔ-tede mɔ, mɔ, kya gyi gesintin sa Wurubuaare. Ɔnen so ne ɔ mɔɔ mɔ. ¹³ Me-nanboana Yesu ɔson dɔ mɔ, nengyene asa abono men kya son Wurubuaare mɔ me kya kyo feye mɔ, fe men sa fe' yegɛ i' wɔra feye ilaa pobɔɔ.

¹⁴ Ibono a kya laare aye-nanboana Yesu asonbo mɔ ilaa mɔ ne n kya yegɛ a kya bii yee a ti nye Wurubuaare ase gɛkyena ɔnan; a man baa fue aye-lewu gemara. Ɔbono, mɔ, ɔ men kya laare mɔ-nanbo ilaa mɔ de fee isa ɔbono o wu' ɔ naa mɔ. ¹⁵ Ɔkamaase ɔbono ɔ kya kyo mɔ-nanbo mɔ gyɛ daa asa ɔmɔɔbo, ne feye gbaa-gbaa fe nyi yee asa ɔmɔɔbo men bo Wurubuaare ase gɛkyena ɔnan.

¹⁶ Ɔenɔɔbono a laa wu gelaare' gbaa-gbaa bii mɔ ne n gyɛ yee Kirisito gi sɔɔ aye-lewu wu' sa aye. Imɔso i kaabore aye kee a' sɔɔ aye-nanboana Yesu asonbo lewu wu' sa ɔmɔ. ¹⁷ A' kyu yee fo ɔko fo bo gɛkyena dɔ ilaa tirisɛ ne fo-nanbo men bo. Nengyene fo keda fo-ansi lee taa mɔ yegɛ mɔ, nne so ne fo laa tɔge yee fo bo gelaare' sa Wurubuaare lii fo-gisen dɔ?

Ɔenɔɔbono Aye-Asen A Man Ɔmaa Aye Wurubuaare Ase Mɔ

¹⁸ Imɔso, me-biana, a kya tɔge yee a kya laare abara ilaa mɔ, in sa i' wɔra gɛnɔ dɔ giyan. I' wɔra daa gesintin-lee gesalaare gɛbono me kya wu aye-ilaa wɔrase dɔ mɔ. ¹⁹ A wɔra gɛnen mɔ ne a laa nye bii yee a buu daa gesintin mɔ ɔkpa. Imɔ ne nan yegɛ ne a laa taale tɔge keda aye-nyoro de in sa i' ɛmaa aye-asen Wurubuaare ase.

²⁰ Owi ɔbono aye-asen a kya ηmaa aye Wurubuaare aɛ mɔ, aη sa a' yɛgɛ i' yɔɔ aye-nyoro. Wurubuaare berɛ, ɔ don aye-rɛ aye-asen. Mɔ ne n nyi ilaa kamaase. ²¹ Me-nanboana laareɛ, nengyene aye-asen a mɛη kya ηmaa aye Wurubuaare aɛ mɔ, gɛnen berɛ mɔ, a kya taale da otu bugi aye-asen sa Wurubuaare ne. ²² Ilaa kamaase ibono a dalaa kole mɔ mɔ, aye-gibaa gi laa yii imɔ. I lii fɛɛ a kya gyi mɔ-nbara mɔ so ne. Gɛnen kee ne a kya wɔra ibono i kya gyi mɔ-ginsi mɔ ne. ²³ Wurubuaare nbara mɔ ne n gyɛ yɛɛ a' ka gyan mɔ-bi Yesu Kirisito so de a' laare abara. Gɛnen ne Wurubuaare gi ka yela sa aye ne.

Fɛ' Daase Ilaa Ibono I Kya Kyena Asa So Mɔ Kerɛ

²⁴ Asa abono pɛwu mɛ kya gyi Wurubuaare nbara mɔ so mɔ, Wurubuaare tɛ mɔmɔ dɔ ne mɔmɔ kee mɛ tɛ mɔ dɔ. Ibono i kya yɛgɛ a kya nyɛ bii yɛɛ Wurubuaare tɛ aye dɔ mɔ, i kya lii daa Wurubuaare Oduduu ɔbono o kyu sa aye mɔ aɛ.

4

¹ Imɔso me-nanboana laareɛ abono fɛ kya son Yesu mɔ, fɛη sa fɛ' sɔɔ ilaa kamaase ibono i kya kyena anyamesɛ so mɔ gyi. Pɛi ne fɛ laa sɔɔ imɔ gyi mɔ, fɛ' daase imɔ kerɛ yɛɛ i lii Wurubuaare aɛ abɛɛ? Abono mɛ kya penɛ asa yɛɛ mɛ gyɛ Wurubuaare ikalan atɔgɛbo mɔ mɛ naa mɛ naa gɛsinkpan so. ² Imɔso ibono i laa yɛgɛ fɛ' bii yɛɛ Wurubuaare Oduduu ne n tɛ ɔko so mɔ ne n gyɛ yɛɛ gɛnen oduduu ɔbono kya kyule lɛɛ tɔgɛ yɛɛ Yesu Kirisito ne n gyɛ Wurubuaare mɔ-bi. Wurubuaare gi sun mɔ ba gɛsinkpan so, ne ɔ baa bingiri nyamesɛ. ɔ kya tɔgɛ gɛnen mɔ, fɛ' bii yɛɛ gɛnen ilaa ibono i tɛ mɔ so mɔ, i lii Wurubuaare aɛ ne. ³ Ilaa kamaase ibono i tɛ nyamesɛ so ne i mɛη kya kyule lɛɛ Yesu ilaa tɔgɛ mɔ i mɛη kya lii Wurubuaare aɛ. Imɔ ibono i gyɛ Kirisito

ɔkyobo mɔ ilaa ne. Fɛ wolaa nu imɔ so yɛɛ i laa ba, ne gɛsintin i ti ba i bo gɛsinkpan so.

⁴ Me-biana, abono fɛ kya ka gyan Yesu so mɔ, fɛye berɛ, fɛ gyɛ Wurubuaarɛ asa gɛsintin. Asa abono mɛ kya penɛ yɛɛ mɛ gyɛ Wurubuaarɛ ikalan atɔgɛbo mɔ, fɛ ti nyɛ ɔlon ɔmɔ so. I kya nyiile yɛɛ Wurubuaarɛ ɔbono ɔ bo fɛye dɔ mɔ gi don ɔbono ɔ naa gɛsinkpan gɛdɛ so faa. Ilaa nyɛnyɛn pɛwu gɛmu mɔ ne n dɛ asa abono mɛɲ kya ka Wurubuaarɛ gɛnɔ mɔ ɔ naa gɛsinkpan so gɛnen. ⁵ Mɛ gyɛ daa gɛsinkpan gɛrɛnaa lɛɛ asa. Gɛsinkpan so gɛkyena dɔ ilaa wolɛ ne n kya lii mɔmɔ-nnɔ dɔ, ne abono gɛsinkpan so ilaa wolɛ ne n bo mɔmɔ-ansi so mɔ kee, mɔ, ne n kya nu mɔmɔ asɛ. ⁶ Aye abono a kya ka gyan Yesu so mɔ berɛ, a gyɛ Wurubuaarɛ asa gɛsintin. Imɔso ɔkamaasɛ ɔbono o nyi Wurubuaarɛ mɔ kya nu aye asɛ. Abono mɛ mɛɲ gyɛ Wurubuaarɛ asa gɛsintin mɔ, mɛɲ kya nu aye asɛ. Gɛnen ilaa idɛ ne n kya yɛgɛ a kya nyɛ bii yɛɛ ilaa ibono i tɛ ɔko so mɔ i gyɛ gɛsintin abɛɛ i gyɛ abon.

Wurubuaarɛ De Abono Mɛ Nyi Wurubuaarɛ Mɔ Mɛ Kya Laarɛ Asa

⁷ Me-nanboana laarɛsɛ, a' laarɛ abara. Gɛlaarɛ' gɛ lii daa Wurubuaarɛ asɛ. Nyamesɛ ɔbono ɔ kya laarɛ mɔ-nanbo ilaa mɔ, i lɔrɔ korogɛ mɔ lii Wurubuaarɛ asɛ ne. O nyi Wurubuaarɛ ne. ⁸ ɔbono mɔ, ɔ mɛɲ kya laarɛ mɔ-nanbo ilaa mɔ, gɛnen isa ɔbono mɛɲ nyi Wurubuaarɛ. I kya nyiile yɛɛ Wurubuaarɛ berɛ gyɛ daa gɛlaarɛ' wura. ⁹ ɔ keda mɔ-bi kolon sun aye asɛ gɛsinkpan so de a' nyɛ mɔ Wurubuaarɛ asɛ gɛkyena ɔnan kyu naa de mɔ so. Imɔ ne n yɛgɛ mɔ-gɛlaarɛ' gɛbono ɔ bo sa aye mɔ gɛ' lii gɛwi. ¹⁰ Ilaa idɛ ne n kya lɛɛ gɛlaarɛ' gbaa-gbaa nyiile. Inɲ gyɛ aye ne n kya laarɛ Wurubuaarɛ ilaa. Wurubuaarɛ ne n kya laarɛ aye-ilaa. Imɔso ne ɔ keda mɔ-bi sun yɛɛ

mɛ' kyu mɔ kyɔɔlɛ kpaarɛ aye-ilaa nyɛnyɛn ibono a wɔra mɔ fue sa aye. ¹¹ Me-nanboana alaarɛsɛ, ibono Wurubuaarɛ gi laarɛ aye-ilaa fafaanan faa, i kaaborɛ aye kee a' laarɛ abara ilaa. ¹² Ɔko-rɛ Ɔko mɛɲ ti taa wu Wurubuaarɛ de ansi kerɛ. Nengyene a kya laarɛ abara ilaa mɔ, i kya nyiile yɛɛ Wurubuaarɛ tɛ aye dɔ, ne a nyɛ mɔ-lɛɛ gɛlaarɛ' ɔnan a dɛ a kya laarɛ mɔ-ilaa.

¹³ A nyi aye-asen dɔ yɛɛ Wurubuaarɛ tɛ aye dɔ ne aye mɔ a tɛ mɔ dɔ. Ibono so a nyi gɛnen mɔ ne n gyɛ yɛɛ Wurubuaarɛ gi sa aye mɔ gbaa-gbaa Oduduu. ¹⁴ Aye mɔ a wu de ansi ne a kya buu a kya sa asa yɛɛ Wurubuaarɛ gi sun mɔ-bi yɛɛ ɔ' baa wɔra anyamesɛ ɔmɔlɛgɛbo gɛsinkpan gɛdɛ so. ¹⁵ Nyamesɛ kamaasɛ ɔbono ɔ kya bugi gɛnɔ tɔgɛ yɛɛ Wurubuaarɛ mɔ-bi mɔ ne n gyɛ Yesu mɔ, Wurubuaarɛ tɛ kaasɛ mɔ dɔ ne kaasɛ mɔ mɔ kee tɛ Wurubuaarɛ dɔ. ¹⁶ Aye berɛ, a ti bii gɛlaarɛ' gɛbono Wurubuaarɛ kya laarɛ aye ilaa mɔ ne aye mɔ a kya ka gyan gɛnen gɛlaarɛ' gɛbono so.

Wurubuaarɛ ne n gyɛ gɛlaarɛ' wura. Imɔso fo ɔbono fo tɛ ne fo dɛ gɛlaarɛ' dɔ mɔ, Wurubuaarɛ tɛ fo dɔ, ne fo-o fo mɔ, fo tɛ mɔ dɔ. ¹⁷ Imɔ ne n kya yɛgɛ aye abono a kya ka gyan Kirisito so mɔ a kya nyɛ Wurubuaarɛ gɛlaarɛ' ɔnan aye-asen dɔ. A nyɛ mɔ-gɛlaarɛ' ɔnan gɛnen mɔ, a laa nyɛ mara akyɔlɛ gɛkaabono Wurubuaarɛ laa gyi anyamesɛ nbɛlɛ mɔ. Imɔ gɛsɛ ne n gyɛ yɛɛ gɛnɔɔbono Kirisito dɛ mɔ, gɛnen kee ne aye abono a kya ka gyan mɔ so mɔ a dɛ gɛsinkpan gɛdɛ so ne.

¹⁸ Nyamesɛ bo gɛlaarɛ' mɔ-gisen dɔ mɔ, ɔ mɛɲ bo gifuu. I kya nyiile yɛɛ fo bo Wurubuaarɛ gɛlaarɛ' ɔnan fo-gisen dɔ mɔ, i kya gya gifuu lii fo-gisen dɔ kpem. I san i bo fo gifuu mɔ, gisobiidɛ ilaa ne fo kya kerɛ. Ɔbono ɔ bo gifuu mɔ mɛɲ ti nyɛ Wurubuaarɛ gɛlaarɛ' ɔnan

mɔ-gisen dɔ. ¹⁹ Aye abono a kya ka gyan Yesu so mɔ a kya laare Wurubuaare ilaa faa mɔ, i lii daa Wurubuaare gɛlaare' gɛbono ɔ daa gilaare aye-ilaa mɔ so.

²⁰ Nengyene ɔko gi tɔge yɛɛ ɔ kya laare Wurubuaare ilaa, yɛge ɔ kya kyo mɔ-nanbo Kirisito sonbo mɔ, kaase ɔbono gyɛ daa ɔbonbo. ɔbono ɔɲ kya laare mɔ-nanbo ɔbono ɔ kya wu de ansi mɔ, nɛ ne ɔ laa laare Wurubuaare ɔbono ɔ mɛɲ kya wu mɔ de ansi mɔ? ²¹ Nbara ndɛ kee ne Wurubuaare gi yela sa aye abono a kya ka gyan Yesu so mɔ. ɔbono ɔ kya laare Wurubuaare ilaa mɔ, i kaaborɛ ɔ' laare mɔ-nanbo Kirisito sonbo ilaa.

5

Wurubuaare Mɔ-Biana Gidebi de Mɔmɔ-ɔlon ɔbono Mɛ Bo Mɔ

¹ Abono pɛwu mɛ sɔɔ gyi yɛɛ Yesu ne n gyɛ ɔbono Wurubuaare gi sun lii Wurubuaare dɔ de ɔ' baa mɔlɛge aye mɔ, i lɔrɔ koroge mɔmɔ lii Wurubuaare ase ne. Mɛ gyɛ Wurubuaare mɔ-biana gɛsintin. ɔbono ɔ kya laare Wurubuaare ilaa mɔ, ɔ laa laare abono mɛ gyɛ Wurubuaare mɔ-biana gɛsintin mɔ ilaa kee. ² Nengyene a nyɛ bii yɛɛ a kya laare abono mɛ gyɛ Wurubuaare mɔ-biana gɛsintin mɔ ilaa mɔ, i laa lii ilaa inyɔ idɛ ase: imɔ ne n gyɛ yɛɛ a kya laare Wurubuaare gbaa-gbaa ilaa ne a kya nu mɔ-gɛdɛ. ³ Nengyene a kya laare Wurubuaare ilaa gɛsintin mɔ, a laa gyi mɔ-nbara mɔ so. Ne mɔ-nbara mɔ so gigyi i maɲ wɔra ilaa bolonsɛ sa aye. ⁴ Nyamesɛ kamaase ɔbono i koroge mɔ lii Wurubuaare ase mɔ, mɔ ne n kya nyɛ ɔlon asa abono mɛɲ nyi Wurubuaare mɔ ilaa wɔrase so. Ilaa ibono i bo aye dɔ ne i kya sa aye ɔlon ne a kya nyɛ kɔ lii ilaa idɛana dɔ mɔ ne n gyɛ gisɔɔgyi gibono a sɔɔ Yesu gyi mɔ. ⁵ Isa ɔmɔ ne nan taale nyɛ ɔlon asa abono mɛɲ nyi Wurubuaare mɔ ilaa wɔrase

so? Gɛnen mɔ, ɔbono ɔ kya sɔɔ gyi yɛɛ Yesu ne n gyɛ Wurubuaarɛ mɔ-bi mɔ wolɛ.

Ibono So A Laa Ka Gyan Yesu So Mɔ

⁶ Yesu Kirisito ne n gyɛ ɔbono ɔ ba gɛsinkpan so ne Wurubuaarɛ gi lɛɛ mɔ-gidebi nyiile asa kyu naa de nkyu nbono mɛ kyu gyere mɔ Wurubuaarɛ sagyere mɔ so. ɔ lɛɛ mɔ-gidebi nyiile asa kee kyu naa de ibono o wu' kyɛɛgɛ mɔ-nkalan fuɛ mɔ so. I mɛɲ gyɛ nkyu mɔ wolɛ so ne Kirisito gidebi mɔ gi lii gɛwi. Nkyu de nkalan so ne mɔ-gidebi mɔ gi lii gɛwi. Wurubuaarɛ Oduduu mɔ kee kya lɛɛ Yesu gidebi mɔ nyiile aye. I lii fɛɛ Wurubuaarɛ Oduduu mɔ bo gɛsintin. ⁷ I bo ilaa isa' ibono i kya lɛɛ Yesu gidebi mɔ nyiile aye. ⁸ Imɔ ne n gyɛ Wurubuaarɛ Oduduu mɔ, nkyu mɔ, de nkalan mɔ. Ne gɛnen ilaa isa' idɛ i kya tɔgɛ daa ilaa kolon.

⁹ Nyamesɛ gi wu ilaa de ansi ne ɔ kya tɔgɛ mɔ, a kya nu mɔ asɛ. Ne Wurubuaarɛ mɔ de-e? Ilaa ibono ɔ laa buu mɔ i maɲ don anyamesɛ-lɛɛ mɔ gbaa bun? To! Ilaa ibono Wurubuaarɛ gi lɛɛ nyiile aye kyu lii mɔ-bi mɔ so mɔ ne n gyɛ ilaa idɛ. ¹⁰ ɔbono ɔ sɔɔ Yesu, Wurubuaarɛ mɔ-bi mɔ, gyi mɔ, ilaa ibono Wurubuaarɛ gi lɛɛ nyiile kyu lii mɔ-bi mɔ so mɔ i bo kaasɛ gisen dɔ. ɔbono mɔ, ɔ mɛɲ kya sɔɔ Wurubuaarɛ gyi mɔ, gɛnen kaasɛ ɔbono kya nyiile yɛɛ Wurubuaarɛ gyɛ ɔbonbo ne. I lii fɛɛ ilaa ibono Wurubuaarɛ gi lɛɛ nyiile kyu lii mɔ-bi mɔ so mɔ, ɔ mɛɲ sɔɔ imɔ gyi. ¹¹ Ilaa ibono Wurubuaarɛ gi lɛɛ nyiile aye mɔ ne n gyɛ yɛɛ ɔ sa aye mɔ asɛ gɛkyena gɛbono gɛɲ bo ɔkara mɔ. Gɛnen gɛkyena gɛbono gɛ kya naa daa de mɔ-bi Yesu so. ¹² Nyamesɛ ɔbono ɔ bo Wurubuaarɛ mɔ-bi mɔ tɛ mɔ dɔ mɔ, gɛnen kaasɛ ɔbono bo Wurubuaarɛ asɛ gɛkyena ne. ɔbono mɔ, Wurubuaarɛ mɔ-bi mɔ mɛɲ tɛ mɔ dɔ mɔ, mɛɲ bo Wurubuaarɛ asɛ gɛkyena.

Wurubuaarɛ Aɛ Gɛkyena de Gɛdala

¹³ N kya ŋmarasɛ ɔwolɛ baarɛ n kya sa fɛyɛ abono fɛ kya ka gyan Wurubuaarɛ mɔ-bi mɔ so mɔ de fɛ' nyɛ bii yɛɛ fɛ bo Wurubuaarɛ aɛ gɛkyena gɛkpaa. ¹⁴ Ilaa ibono a nyi aye-asen dɔ ne i kya yɛgɛ a kya nyɛ bugi aye-asen sa Wurubuaarɛ mɔ ne n gyɛ yɛɛ a kya kolɛ mɔ ilaa kamaasɛ ne i gyɛ mɔ-gɛlaarɛ dɔ mɔ, ɔ kya nu aye aɛ. ¹⁵ Nengyene a nyi yɛɛ Wurubuaarɛ kya nu ilaa kamaasɛ ibono a kya kolɛ mɔ mɔ, a nyi kee yɛɛ ɔ ti nu aye-ndalaa ne ɔ laa wɔra sa aye.

¹⁶ Nengyene fɛɛ fo ɔko fo wu fo-nanbo Kirisito sonbo kya wɔra ilaa nyɛnyɛn iko ne i mɛɲ gyɛ ilaa ibono i laa baragɛ mɔ-rɛ Wurubuaarɛ nsana gɛkpaa mɔ, dala kolɛ Wurubuaarɛ sa mɔ. Fo dala sa mɔ mɔ, Wurubuaarɛ laa sa mɔ Wurubuaarɛ aɛ gɛkyena ɔnan. Nyamesɛ ɔbono mɔ-ilaa nyɛnyɛn i mɛɲ gyɛ ilaa ibono i laa baragɛ Wurubuaarɛ mɔ-rɛ mɔ nsana gɛkpaa mɔ wolɛ ne n' dare gɛnen. Ilaa nyɛnyɛn iko i bo no i kya baragɛ Wurubuaarɛ mɔ-rɛ nyamesɛ nsana gɛkpaa. Iɲ gyɛ imɔ ibono so ne n' kya tɔgɛ yɛɛ fɛ' dala sa ɔbono mɔ. ¹⁷ Ilaa kamaasɛ ibono iɲ boran sa Wurubuaarɛ mɔ, i gyɛ ilaa nyɛnyɛn. I bo ilaa nyɛnyɛn iko ɔnan berɛ ibono iɲ kya baragɛ Wurubuaarɛ mɔ-rɛ nyamesɛ nsana gɛkpaa.

¹⁸ A nyi yɛɛ ɔkamaasɛ ɔbono i lɔrɔ korogɛ mɔ lii Wurubuaarɛ aɛ mɔ maɲ kpɛ ɔ kya wɔra ilaa nyɛnyɛn. Kirisito ɔbono i korogɛ mɔ lii Wurubuaarɛ aɛ mɔ ne n kya dii fo gɛnen kaasɛ ɔbono ne ɔbonsan, nyamesɛ nyɛnyɛn mɔ mɛɲ kya nyɛ yii fo. ¹⁹ A nyi yɛɛ aye abono a kya ka gyan Yesu so mɔ a gyɛ Wurubuaarɛ aɛ gɛsintin. Asa sɛnsɛ pɛwu abono mɛ bo gɛsinkpan so mɔ, mɛ bo daa ɔbonsan, nyamesɛ nyɛnyɛn mɔ abaa dɔ.

²⁰ A nyi kee yɛɛ Wurubuaarɛ mɔ-bi Yesu Kirisito gi ba gɛsinkpan so, ne o bugi aye abono a kya ka gyan mɔ so

mɔ ansi de a' bii ɔbono ɔ tansi ɔ gyɛ Wurubuaarɛ mɔ. Aye-rɛ ɔbono ɔ tansi ɔ gyɛ Wurubuaarɛ mɔ a san a gyɛ nyamesɛ kolon. Aye-rɛ Wurubuaarɛ mɔ-rɛ mɔ-bi Yesu Kirisito ne n san a gyɛ nyamesɛ kolon. Wurubuaarɛ tansi ɔ gyɛ Wurubuaarɛ, ne mɔ kee ne n kya sa Wurubuaarɛ asɛ gɛkyena gɛbono gɛɲ bo ɔkara mɔ. ²¹ Imɔso, mebiana, fɛ' dii fɛye-nyoro de fɛ mɛɲ sa fɛ' son ilaa banban iko baa bɔla de Wurubuaarɛ.

ḠḠḠḠ ḠḠḠḠḠ, ḠḠḠḠḠ ḠḠḠḠḠḠḠ ḠḠ ḠḠḠḠ ḠḠḠḠḠ
AnyamesḠ ḠḠ ḠḠḠḠ ḠḠḠḠ

The New Testament in the Gikyode language

copyright © 2020 Wycliffe Bible Translators, Inc.

Language: Gikyode

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 30 Nov
2021

4cc402b4-139a-5f33-9af9-fbf62307f663